

“Dame husi Hau, Dame iha Família, Dame bá Ita Hotu”

Diskursu Sekretaria Estadu ba Promosaun Igualdade Sra. Idelta Maria Rodrigues
iha Serimonia Abertura

Kampanha Loron 16 Atvizmu Kontra Violénsia Hasoru Feto

Lospalos, 25 Novembru 2011

Na'i Ulun doben sira mak hau respeita
Bainaka doben sira
Señor no Señora sira

Iha dékada ka tinan sanulu liu bá, nasaun sira iha mundu rai klaran tomak marka tiha ona 25 Novembru hanesan loron ida ne'ebé sira hahú tau sira nia komitmentu atu elimina forma hotu-hotu kona-ba violénsia hasoru feto.

Tinan-tinan, ita uza loron ida ne'e hanesan oportunidade atu hapara ho refleta kona-ba to'o iha ne'ebé susesu bá ita nia esforsu hotu hodi kombate violasaun direitu umánu ida ne'e, ne'ebé ita hatene akontese iha fatin hotu-hotu.

Saida mak Kampanha Loron 16? Atvizmu loron 16 hasoru violénsia bazéia bá jéneru mak kampanha internasionál ida ne'ebé hahú husi *Womens Globál Leadership Institute* organiza husi *Centre for Womens Globál Leadership* iha tinan 1991.

Partisipantes sira hili loron 25 Novembru (Loron internasionál bá halakon violénsia hasoru feto) no 10 Dezembru (Loron Direitu Umánu) hodi halo ligasaun simbolikamente entre violénsia hasoru feto ho direitu umánu mós hatudu katak violénsia hasoru feto mak violasaun bá Direitu Umánu.

Kampanha loron 16 mak iniciativa mundiál ne'ebé tenta atu: Hasae koñesimentu iha nível lokal, nasionál, no internasionál kona-ba violénsia hasoru feto, hakbiit rede lokal, halo ligasaun entre atvizmu lokal no atvizmu mundiál, fornese forum ida bá dialogu no partilla stratégia, dudu Governu hodi implementa kompromisu ne'ebé sira hato'o iha nasionál no internasionál, no hatudu solidaridade aktivista iha mundu tomak.

Kampanha loron 16 laos eventu ida iha fatin ida ka nasaun ida, kampanha ne'e maka atividades barak ne'ebé mai husi iniciativa lokal, nasionál no internasionál.

Oinsa hanaran kampanha loron 16 no tamba sa halao durante loron 16?

Kampanha Loron 16 tinan bá tinan halao durante periodu loron 16 hahú husi Loron Internasionál Halakon Violénsia Hasoru Feto (25 Novembru) to'o Loron Internasionál Direitu Umánu (10 Dezembru) hodi hato'o deklarasaun simbolikamente katak Violénsia Hasoru Feto maka Violasaun Direitu Umánu. Periodu loron 16 ne'e mós hatudu loron importante balun hanesan 29 Novembru nudar Loron Internasionál Defensor Direitu Umánu Feto nian, 1 Dezembru nudar Loron Internasionál AIDS no 6 Dezembru nudar Aniversáriu Masakre Montreal.

Loron ida ne'e 25 Novembru marka kona-ba hahú ita nia kampanha nasionál loron 16 Atvizmu Kontra

Violéncia Hasoru Feto iha Timor-Leste. Ita nia tema bá kampaña tinan ida ne'e mak: **Dame Husi Hau, Dame iha Família, Dame bá Ita Hotu.**

Liu husi ita nia abertura iha Lautem ho simultaneamente mós iha fatin sira seluk iha nasaun laran tomak, ita sei konsentra no esforsu hodi kria ka halo konsensializasaun ida ne'ebé bo'ot ho hatene problema ida ne'e liu husi diálogu, Sosiálizasaun, nudar oportunidade bá ita atu refleta iha família. Husu bá ita a'an oinsa violéncia haré husi husi parte valór kulturál no istória. Feto maluk balun sei iha hanoin katak mane iha direitu atu halo violéncia hasoru feto.

Bazéia bá dadus husi PNTL, UNPOL, tinan 2010 total 688 keixa ne'ebé hato'o ona bá PNTL, 438 mak Kazu Violéncia Doméstika. Ne'e hatudu katak tinan 2010 kazu hirak ne'e aumenta kompara ho tinan 2009.

Tuir Demographic Health Survey (DHS), 38% feto TL iha esperiéncia moris sofre violéncia, hahú kedas ho tinan 15. Iha Distritu Lautem númeru ne'ebé esperiéncia violéncia fíziku hamutuk 53%. Iha 75% kazu akontese husi sira nia kaben mane rasik mak halo violéncia hasoru sira. Bazéia bá estatística ne'e feto hasoru violéncia fíziku iha uma laran ne'ebé númeru husi mane 81% hanoin/justifika konsiéncia hodi baku feto. 38% feto hatete katak wainhira sira tein hahan mutuk sira nia laen baku sira. 44% hatete katak wainhira sira diskute malu ka hasoru sira nia kaben entaun sira hetan baku. 65% feto wainhira sai lahatete, sira nia kaben sei baku sira. 86% feto iha hanoin katak mane iha direitu atu baku ka halo violéncia bá sira.

Distritu Lautem tuir dadus Demographic Health Survey hatudu katak distritu ne'e kazu bá Violéncia Sexual a'as ho númeru 6.8. Violéncia fíziku ho númeru 53.1% a'as ho númeru 3 iha Timor-Leste no kazu Violéncia Doméstika bá tinan 2011 ho númeru 6 (númeru ki'ik).

Adopsaun LKVD iha tinan kotuk importante tebes bá Timor-Leste no sai nudar prioridade ida iha momentu ida ne'e, atu bele garante efetividade husi implementasaun lei refere.

- ✦ Atu implementa LKVD, SEPI sei kontinua halao Sosiálizasaun kona-ba lei refere no mós halo konsultasaun no dezenvolve kona-ba PAN ne'ebé komprensívu atu halakon VD.
- ✦ To'o iha momentu ida ne'e konsultasaun halao ona iha Distritu 4 no durante kampaña sei halao mós konsultasaun ida iha Distritu Lautem.
- ✦ SEPI servisu hamutuk ho MSS atu hametin liutan rede referál linha servisu iha Distritu, SEPI mós suporta PRADET atu loke fatin hakmatek iha Oecusse, Suai, e loke mós fatin hakmatek iha Maliana ho Lospalos iha tinan 2012.
- ✦ Hamutuk MSS ho UNFPA, SEPI suporta atu finaliza prosedur standar operacional bá referál bá vítima VBJ entre forneselementu servisu, inklui Polisia. MSS, hetan suporta husi IRISH AID ho UNFPA atu Sosiálizasaun iha prosedur liu husi partipantes 200 iha Distritu 9.

Ita presiza duni eduka ita nia maluk sira hahú husi uma laran, katak Violéncia ne'e krime, labele akontese. Ita tenke muda ita nia atitude ne'ebé ladi'ak para ita bele moris hakmatek. Tamba lei atu proteje ema husi violéncia doméstika eziste tiha ona iha ita nia rain ne'ebé aprova ona husi PN iha tinan 2010. Fila fali mai ita, lei iha ona. Implementasaun husi ita nia an rasik! Ita tenke hahú husi ita nia an, Governu, Sociedade sivil no autoridade lokal no comunidade hotu, liu-liu responsabilidade husi individu idak-idak. Família nudar fundasaun ida forte atu garante estabilidade iha uma laran no mós iha sociedade nia leet. Ita hotu nia responsabilidade atu proteje feto no ita nia família tomak husi hahalok at ka violéncia atu bele hetan dame no felisidade.

Dame husi Hau, Dame iha Família, Dame bá Ita Hotu!